

四庫全書

集部

欽定四庫全書

御定歷代賦彙卷一百二十二

花果

芙蓉賦

漢
閔鴻

乃有芙蓉靈草載育中川竦修幹以陵波建綠葉之規
圓灼若夜光之在玄岫赤若太陽之映朝雲乃有陽文
修嫵傾城之色揚桂棹而來遊玩英華乎水側納嘉賓
兮項筐珥紅葩以為飾感桃夭而歌詩申關雎以自敕

嗟留夷與蘭芷聽鶼鶼而不鳴嘉芙蓉之殊偉託皇居
以發英

芙蓉賦

魏
曹植

覽百卉之英茂無斯華之獨靈結修根於重壤汎清流
而擢莖其始榮也皦若夜光尋扶桑其揚暉也晃若九
陽出暘谷芙蓉蹇產茁茁星屬絲條垂珠丹榮吐綠焜
焜韡韡爛若龍燭觀者終朝情猶未足於是狡童媛女
相與同遊擢素手於羅袞接紅葩於中流

芙蓉賦

晉夏侯湛

臨清池以遊覽觀芙蓉之麗華潛靈藕於玄泉擢修莖
乎清波煥然蔭沼灼爾星羅若乃迴縈外散茁茁內離
的出豔發葉恢花披綠房翠蒂紫飾紅敷黃螺圓出垂
蕤散舒纓以金牙點以素珠固陂池之麗觀尊終世之
特殊爾乃採淳葩摘圓質析碧皮食素實味甘滋而清
美同嘉異乎橙橘參嘉果以作珍長充御乎口寶

芙蓉賦

晉潘岳

蔭蘭池之豐沼育沃野之上腴課衆榮而比觀煥卓榮
而獨殊狎獵雲布密咤星羅光擬燭龍色奪朝霞丹輝
拂紅飛鬢垂的紛披絕赫散煥熠燿流芬賦采風靡雲
旋布濩磊落蔓衍天閑發清陽而增媚潤白玉而加鮮

芙蓉賦

宋鮑照

感衣裳於楚賦詠憂思於陳詩眈羣英之艷絕標高名
於澤芝會春陂乎多張褰芙蓉而水嬉抽我襟之桂蘭
點子吻之瑜辭選羣芳之徽號

原本闕
六字

抱茲性之清芬稟

若華之驚絕單蓋陽之妙手測滌池之光潔爍形輝之
明媚榮雕霞之繁悅顧椒丘而非偶豈園桃而能埒彪
炳以蒨藻翠莖而紅葩青房兮規接紫的兮圓羅樹妖
姪之弱榦散菡萏之輕荷上星光而倒景下龍鱗而隱
波戲錦鱗而夕映濯繡羽兮晨過結游童之湘吹起榜
妾之江歌備日月之溫麗非盛夏而謂何若乃當融風
之暄溢承暑雨之平渥被瑤塘之周流繞金渠之屈曲
排積霧而揚芬鏡洞泉而含綠葉折水以為珠條集露

而成玉潤蓬山之瑤膏輝蔥河之銀燭冠五華於仙草
超四照於靈木雜衆姿於開卷閱羣貌於昏明無長袖
之容止信不笑之空城森紫葉以上擢紛湘蕊而不傾
根雖割而琯徹柯既解而絲縈感盛衰之可懷質始終
而常清故其為芳也綢繆其為媚也奔發對妝則色殊
比蘭則香越汎明彩於宵波飛澄華於曉月陋荆姬之
朱顏笑夏女之光髮恨狎世而貽賤徒愛存而賞沒雖
凌羣以擅奇終從歲而零歇

芙蓉賦

宋 傅亮

考庶卉之珍麗實總美於芙蓉潛幽泉以育藕披翠蓮而挺敷汎輕荷以冒沼列紅葩而濯除徼旭露以滋采靡朝風而肆芳表麗觀於中沚播郁烈於蘭堂在龍見而萌秀於火中而結房豈呈芬於芷蕙將越味於沙棠詠三閭之被服美蘭佩而荷裳伊玄匠之有瞻悅嘉卉於中渠既暉映於丹墀亦納芳於綺疏

蓮花賦

有序

梁 江淹

余有蓮花一池愛之如金宇宙之麗氣難息絕聊書竹
素儻不滅焉

檢水陸之具品閱山海之異名珍爾秀之不定乃天地
之精英殖東國之流詠出西極而擅名方翠羽而結葉
比碧石而為莖蕊金光而艷色藕冰拆而玉清載紅蓮
以吐秀披絳花以舒英故香氛感俗淑氣參靈躑躅人
世茵蔯祗冥青桂羞烈沈水慚馨於是生乎澤陂出乎
江陰見綵霞之夕照覲雕雲之晝臨既翕艷於洲漲亦

映暖於川潯奪夜月及熒光掩朝日與絕火出金沙而
延曜被綠波而覃氾冠百草而絕羣出異類之衆夥故
仙聖傳圖英隱留記一為道珍二為世瑞發青蓮於王
宮驗竒花於陸地若其江澹澤芬則照電爍日池光沼
綠則明壁洞室曜長洲而瓊文映青崖而火質或馮天
淵之靖峭或殖疏圃之蒙密故河北櫂歌之妹江南采
菱之女春水厲兮楫潺湲秋風駛兮舟容與著縹芰兮
出波擘綳蓮兮映渚迎佳人兮北燕送上客兮南楚知

荷華之將宴惜玉手之空佇迺為謠曰秋鴈度兮芳草
殘琴柱急兮江上寒願一見兮道我意千里遠兮長路
難若其華實各名根葉異辭既號芙蓉亦曰澤芝麗詠
楚賦豔歌陳詩非獨瑞草爰兼上藥味靈丹沙氣驗青
瓊乃可劒棄海岫龍舉雲臺畫臺殿兮霞蔚圖縑縞兮
炳燦永含靈於洲渚長不絕兮川壑

蓮賦

宋
文同

彼芳蓮之紛敷兮乃橫湖之繡繪挺濁淤以自潔兮淥

清漪而逾麗纖空其上下兮細理周其向背甘夜凝而
露浥兮清香馥而風遞向水筋與玉骨兮外吐心而露
肺承寶座之千趺兮蔭琬輿之萬蓋張翠帷於月下兮
列綵仗於煙際容鷗鷺之徙倚兮取龜魚之芘賴既帖
水以不競兮復沿涯而自退實華蘊之上品兮豈草木
之一槩

蓮花賦

宋陳普

夫天地之生物各品類以賦形惟木行之為盛分四序

而數榮梅枝可以知乾坤之消息
莫英可以知月數之
虛盈
蕙蘭紛其秋香
竹松凌其冬青
繫茲蓮之為卉兮
托濕壤之根莖
於時炎風烜燠
畏景朱明
湖光澄練
池館風生
張當炎之綠蓋
施傳粉之紅英
紫芭冉冉淨植
亭亭俯如鱗集
仰若塔層出於泥而不染
含清露而敲
頰色幽幽
兮不媚香遠遠
兮益清嬌
楊妃之欲語
非六郎之可名
宜元公之獨愛
是以有君子之稱也
若夫紅中之白
清素可貴
燦燦瓊臺
搖搖玉珮
或同輪而雙頭

或千葉而出類是皆水宮之仙子為赤帝呈祥而獻瑞
至於萍光轉霽細風微波雕畫舫金叵羅或凌波而觴
酌或託聲於陽阿是皆一時之賞翫恐紅芳之蹉跎也
客有執爵而繼歌曰太華高兮嵯峨玉井深兮奈何安
得長梯取霜雪之藕兮痊濁世煩溽之沈疴

蓮花賦

有序

宋李綱

釋氏以蓮花喻性蓋以其植根淤泥而能不染發生清
淨殊妙香色非他草木之華可比故以為喻宋之間歐

陽永叔皆嘗賦之清便富豔然未嘗及此余暇日訪羅疇老修撰見其園池蓮華盛開因感而為賦極其美而卒歸於正云其辭曰

偉哉造物之播氣也天地絪縕陰陽盪摩植物得之發為奇葩葩之甚奇莫如蓮花擢修幹於波瀾結芳根於泥沙氣馥芝蘭彩豔雲霞相草木之芳菲孰色香之可加綠水如鏡紅裳影斜乍疑西子臨谿浣紗菡萏初開朱顏半醺又如南威夜飲朝歌亭亭煙外凝立委佗又

如洛神羅襪凌波天風徐來妙響相磨又如湘妃瑟鼓
雲和嬌困無力搖搖纖柯又如戚姬楚舞婆娑風雨摧
殘飄零紅多又如蔡女蕩舟抵訶爾乃藕埋玉骨花炫
新妝綠荷倚葢翠葍連房修莖聳碧嫩蕊搖黃貯盈盈
之真色汎萼萼之天香斂若凝羞婉若含笑仰若迎風
俯若窺沼波靜露寒風清月曉動嬉戲之游魚來翻翻
之白鳥藹江湖之秋思增園亭之幽眇則有高世之士
味道之人悟色香之妙覺獲圓通於見聞深契無生不

離根塵豈止玩其英華攬其芳芬而已哉言觀其本生
於淤泥言觀其未出於清漪處汙穢而不染體清淨而
不移至理圓成熟能知之西方之人強名為佛以茲取
喻其誰曰不是以毗盧之坐千葉齊敷華藏之海十方
咸出唯植根之得地爰開華而結實功用既圓退藏於
密返觀自性之蓮花又何資於造物

荷花賦

宋 歐陽修

步蘭塘以清暑兮颯蘋風以中人
擷杜若之春榮兮蹇

芙蓉於水濱嘉丹葩之耀質出渌水而含新蔭曲池之
清泚漾波紋之淵淪披紅衣而耀彩寄清流而託根挺
無華之淺豔靡競麗乎先春抱生意以自得兮及薰時
之嘉辰若夫夏晄蘭哀夢池草密慘羣芳之已銷獨斯
蓮之迴出可以嗅清香而析醒可以玩芳華而自逸况
其晚浦煙霞水亭風日投文竿而餌垂泳萍莖而波溢
絲紫藕以全折杯卷荷以半側墜紫葍以散煙斂紅芳
而向夕可憐影兮相顧列金葩而返植清風過以似起

碧霧合而乍失或兩兩以相扶漸亭亭而獨出發臙脂
於北土生異香於西域匪江妃之小腰即廣陵之清骨
爾乃曲沼微陽橫塘細雨逐橋上之歸鞍笑堤邊之游
女墮虹梁而窺影倚風臺而欲舞覆翠被以薰香然犀
燈而照浦雙心並根千株泣露湛月白而風清香池平
而樹古送艇子於西州聞棹謳於北渚迎桃根而待櫂
逢宓妃而未渡迫而視之靚若星妃臨水而脈脈盈盈
遠而望之杳如峽女行雲而朝朝暮暮其妖麗也其閑

雅也香荃橈兮木蘭舟澹容與兮悵夷猶東西隨葉隱
上下逐波浮已見雙魚能比目應笑鴛鴦會白頭昔聞
妃子貴東鄰池上金花不染塵空留此日田田葉不見
當時步步人

荷花賦

明
何景明

曲池兮清波綠葉兮丹華叢生兮若屯並蒂兮連葩爾
其耀靈株之蒺綏兮扶輕荷而低昂呈紅顏以流睇兮
麗繁星之煒煌枝婀娜以承蕤兮媚清連而揚芳委微

吹以披靡兮紛若纖羽之回翔倏煙霏而霧滃兮態隱約而凝妝蔽華月於鮮雲兮晃朝日之照虹梁乃若遠兮益清近兮愈妍接皋蘭以被縹映堤楊而聯娟垂清房以綴珠結翠萍而連錢美曼如靜女蹁躑若飛仙恣意態之橫出匪擬像之可殫於是乃有姣姬連袂或三或五貌傾名都香出洛浦祛微袿御輕紗操木蘭揭蘅蒨赴中流而競掇竦迅體而揚波於是稱曰綠波揚兮清風會歌宛轉兮聲流啜花為房兮翳荷蓋弗樂胡為

今歲云邁又稱曰製綠芰兮為衣把瓊枝兮餐玉蕤夜
已央兮風露微明河繁宿兮橫參差心中樂兮樂忘歸

秋蓮賦

有序

唐
宋之問

天授元年敕學士楊炯共之間分直於洛城西入閣每
雞鳴後至羽林仗閣人奏名請龜契佇命拱立於御橋
之西玉池清泠紅蕖茁茁謬履扃闥自春徂秋見其生
視其長觀其盛惜其衰得終天年而無夭折者良以隔
礙仙禁人莫由見向若生於瀟湘洞庭溱洧淇澳即有

吳姬越客鄭女衛童芳心未成採擷都盡今委以白露
順以涼風榮落有期私分畢矣斐然願歌其事久之乃
為秋蓮賦焉

若夫西城秘掖北禁仙流見白露之先降悲紅蕖之已
秋昔之萋萋齊秀芬敷競發君門閤兮九重兵衛儼兮
千列綠葉青枝緣溝覆池映連旗以搖豔輝長劒兮陸
離疏瀍兮引轂交流兮相沃四繞兮禁營三入兮承明
曉而望之若霓裳宛轉朝玉京夕而察之若霞標灼爍

散赤城既如秦女豔日兮鳳鳴又似洛妃拾翠兮鴻驚
足使瑤草罷色芳樹無情複道兮詰曲離宮兮相屬飛
閣兮周廬金鋪兮壁除君之駕兮旖旎蓮之葉兮扶疎
萬乘碩焉駐綵騎六宮喜兮停羅裾仰仙遊而德澤縱
玄覽而神虛豈與夫溪澗兮沼沚自生兮自死海沂兮
江沱萬里兮煙波汎漢女遊湘娥佩鳴玉戲清波中流
欲渡兮木蘭楫幽泉一曲兮採蓮歌江南兮峴北汀洲
兮不極既有芳兮莎城長無豔兮水國豈知移植天泉

飄香列仙嬌紫臺之月露含玉宇之風煙雜芳兮昭屬
衆彩兮相宣鳥翡翠兮丹青翰樹珊瑚兮林碧鮮夫其
生也春風晝蕩燦日相煎天桃盡兮穠李滅出大隄兮
豔欲燃夫其謝也秋灰度瑄金氣騰天宮槐疎兮井梧
變搖寒波兮風颯然歸根息豔兮八九月乘化無窮兮
千萬年越人望兮已長久鄭女採兮無由緣何深蒂之
能固何香名之獨全別有待制揚雄悲秋宋玉夏之來
兮翫早紅秋之暮兮悲餘綠禮盛燕臺人非楚材雲霞

圖兮蘭為閣金銀酒兮蓮作杯落英兮徘徊風轉兮衰
頽入黃扉兮灑錦石縈白蘋兮覆綠苔寒暑忙忙兮代
謝故葉新花兮往來何秋日之可表託芙蓉以為媒

瑞蓮賦

元
劉詵

遡青原而西驚踰北郭之十里橫溪漫漫重阜伏起層
軒危榭東縵西峙吾伊出竹行者為喜問其間之何人
知夫子之洵美萬山拄頰堂有流水播播其渠濺濺其
沚衆芳繞而成宮羣碧葦以為祀當炎雲之散漫走峻

壁之赤煒黃塵漲於門衙玄閭隔以尺咫忽笑渠之效
祥葩一本而並蒂轟萬花之如雲何此美之獨異於是
者幼羣觀賓游聚詣飛杯賞勝援筆賦瑞記同榦於天
泉歌合歡於西內羌藍田之連壁胡驟獲於不藝豈仙
人之雙盤猶抗立於千歲循環不解豐斂同氣高疑聯
冠俯若駢袂相倚如揖相依如醉頽陽亞影輕雨對淚
煙墩增妍露墅助媚乃若暎色在樹清風被蘭娟擢秀
以並潔屹競色而兩難泣袖唾以相眩失增城之紈班

此其態也而未離乎塵間零露試玉涼月流丸澹同心
之莽莽落連珮之珊珊渺所思兮湘水望蒼梧而不還
此其意也而未足以窮造化之端嗟夫太和之在古今
常易類而難諧晚水火之異質企參辰而無涯偶不足
以勝竒迨其遇而非儕遡重華之濬美睠庠亭之可懷
怨乘舟之秋風歌不容其漢淮丘與軻兮不並周與召
兮猶難偕紛是卉之何情忱矯薄而媿乖同光和義比
潔夷齊秀出玄朗芳壓雲機木連理而讓瑞禾同穎而

避祺鍾衆美於一榦合二妙而無俛撫六合之曠垠胡
君宇之若私念禎異之有兆若春蒸而雲滋彼智者之
未覲每托物而先知根盤盤以信厚葩采采而書詩倚
庭柱而揮塵傲俗子以厥免持紫蓬萊泛紅昆池梯太
華之萬仞送水天之千枝暖此和於天地麥雨秀而九
芝然後乘太一之舟踞千載之龜酌大湖之酒而歌先
生之詩亦宇宙之一奇也

瑞蓮賦

有序

明
申時行

唯聖皇御歷十有四年道化滂流和氣翔洽於時崇慈
寧之新構備尊養之上儀大孝潛孚靈貺昭答乃有嘉
蓮獻異重臺發祥萬乘臨觀六宮燕喜信熙時之上瑞
馨德之貞符爰付丹青用垂琬琰命臣等賦之臣謹拜
手稽首而作賦曰

若夫璇宮壯麗紫殿巍巍接蓬萊之仙苑環太液之恩
波渟泓玄澤醞釀醇和欣嘉生之咸鬯紛靈瑞其何多
宛彼芙蕖嫣然沼沚載以文罍陳之金卮覆碧葉兮田

田漾清漣兮泚泚被蔭紉蘭抽黃曳紫既冉冉以流馨
復重重而結綺爾其豔外生豔華中吐華剖碧房兮敷
絳萼幻珠寶兮成丹葩粲英英其疊起芬郁郁其交加
乃若旭日方升卿雲有爛初抱赤兮若傾忽飛丹兮若
煉如盤如蓋臨金掌以腫朦非霧非煙照虹梁而璀璨
又若桂輪乍滿蕙露初零凝清輝兮湛湛漱芳潤兮盈
盈紺宇層樓接銀潢而激濫雲鬢高髻開寶鏡以晶熒
又若涼雨纔收薰風徐送濯雲錦兮澄鮮舞霓裳兮飛

動凌波綽約宛洛浦之驚鴻翮羽蹁跹恍秦臺之儀鳳
至於星敷電發霧變霞蒸觸景而生態隨物而賦形縱
他卉之穠麗未若茲花之最靈觀其托體慈闈敷榮秘
殿映藻井以生妍傍綺疏而呈倩煒煌三秀之庭搖曳
五明之扇載色載笑如承長樂之歡來遊來觀每荷重
瞳之眷詫神物之有知信人寰之創見豈比夫駢花並
實連理分枝望舒生於漢圃合歡產於唐池太華峰頭
徒詠如船之異麻姑壇上虛傳變碧之奇斯葢重申之

佑命特顯象於昌期猗與吾皇德如虞聖時業業以憂
勤日夔夔而祇敬承顏順志極尊養之隆解慍阜財布
寬仁之令故珍貺駢臻而奇祥疊應繩繩繼繼用彰累
葉之休赫赫明明式表重華之盛尚增修於玄德庶永
承乎天慶

瑞蓮賦

有序

明
郭正域

萬厯丙戌禁中重臺瑞蓮盛開上以示臣等既被之聲
歌矣尤以其韻簡而語寂不足揚盛美也乃奉命作賦

其辭曰

若夫紫宮瑞孕瓊沼花開蘋風始振澤露初來羨水芝
之異質被五沃之塵埃既紛披而挺瑞迺疊蕊而重臺
綠葉青葩紅萼紫萼上疎芳柯下歲修葢陋羣卉之孤
寡笑凡花之五出重結雲房紛敷寶液似玉樓之層檐
像浮屠之數級萼森白羽影疊金塘丹閨耀彩紫禁生
香豈蕊宮之仙子縱寶髻而臨鏡光將梵王之天女步
金網而照寶牀於時天顏有喜況此金波聖母來臨慈

顏有酖六宮笑覩牽裾停羅乃使柏梁擬賦慶雲傲歌
清平命調女史采和乃歌曰涼風八月灝氣寒夭桃既
滅穠李殘禁池蓮葉何田田瓊華重結倍可憐珊瑚排
根翡翠紈眼見結子臨清瀾又歌曰荷兮為柱藕為船
月明秋水兩澄鮮霓裳羽衣何踰躔紅芳欲貯赤城煙
吳姬衛女空延緣瑤池阿母壽萬年夫花比君子不污
泥壤羨此重臺是為道長花開太一實坐仙真羨此重
臺是為壽徵况托根於靈沼迺露於綺疏慶采擷之

不及豈彼澤之能如惟中心之含赤故菡萏之重敷幸
君王之我顧可大書而特書若彼金蓮鑿步徒誇容與
太液開花謾嬌解語鬪麗質之盈盈羨衣裳之楚楚曾
比德於吾皇不侈聲於禁籞

迎華觀瑞蓮賦

元陳樵

銀谷山人秋食菊英夏居荷屋瞰玄林蔭珍木援風枝
倚露竹解佩薦蘭分流互綠繞蝶圍蜂量花以谷愛萬
物之光輝遲丹榮之綺縟於是鬱金在柳丹入春萸冶

葉倡條凌亂紛披縹蒂丹膚雪骨霜蕤染金陵以為碧
添膩紫之紅滋亦有蟠桃緗梅碧柺梨購玉蕊於三
秦來戎王於月氏分朝家之藥樹進百越之扶荔出平
泉之鮮藻致玉李於琳園靈瓜兮崆峒紫杏兮三玄又
有溟海如瓜之棗崑崙百子之蓮銀桃碧藕朱梅玉蘭
英蕤纂纂豔實酣酣春透餘胥落蕊闌干歎薜英之歸
華玩朝花之小倩於是知微子過而咻之出瑞應之圖
而謂之曰子能致名花美石而不能植朱草與金芝人

能致嘉蓮瑞木而不能使生於林池子獨不見昔者淮
陽金帶之園今海右芙蓉之嘉瑞乎觀其庭闌清峻綠
水涵虛公侯至止靈苗日敷自公銷夏翠綠丹朱飛鳧
為之拂舞朱鳥為之翔翥藻緡相輝風翔雨舞外之則
素質流丹垂葩接跗內之則紅銷白越鬢聯齊縷金粟
在鎔脂澤迎露玉珎相思之心苞約流黃之素聯珠微
漲金膏如汚花房旦開天香微度莖裊銀篴之管陰聯
翠羽之帷綵雲墜則宓妃游女之凌波雨勢酣則優人

索寒之浣水至其魚浮積翠日在蘭芷又若秦王懸鏡而色動樊劉唾盤而成鯉披叢凝睇連芳具美弱鬢雙綰金枝對起若嬋與娟兮方駕英與皇兮倚竹又若女同居兮蘭心禽宛頸兮河曲朱鷺將飛而目成媚蝶接影而相逐罷單鴻寡鳬之奏辭別鶴孤鸞之曲連雙禽於一縱配繁弦之雙鵠寶勝擬之而翻飛鏤錦繼之而來復相逢之樂成聲聯臂之歌相續豈比夫東伯勞而西燕背面傷春而獨宿者哉觀乎氣韻生動一花二妙

晞金殿以飄丹出公侯之池沼此非地產是謂天造造不自天自帝有詔蓋盛德大業之在公物莫掩其光耀而英華外發從公所到故奉詔朔方則見之朔方命之十道則見之十道問之花神而莫予知索之主林而莫之效香繞洞玄之天而赤松攬其餘照是豈人間之香豔吳兒之花草也邪山人曰吾聞德之厚者無薄發占其源者視其委蕃釐作合於三神觀禎何有於東甌蓋兼而兩者蕭曹之將相實連錢者王謝之子弟藹薰胥

以為祥無但以花木視之也於是緒言未既民有歌於
途者曰水花兮蕊蕊祥風兮佳氣非動非植兮從公而
至藕方舟兮不足為其廣遠花百尺兮不足盡其巨麗
抑南枝出於東海之上而北枝出於鳳凰之池者邪山
人悅之使反之而和之曰桑麻靡曼兮禾黍蒙蒙更清
素兮年屢豐民食其實兮春華在躬抑袁宏謝安石之
仁風歟沈隱侯之春風歟

採蓮賦

梁簡文帝

望江南兮清且空對荷華兮丹復紅卧蓮葉而覆水亂
高房而出叢楚王暇日之歡麗人妖豔之質且棄垂釣
之魚未論芳萍之實唯欲迴渡輕船共採新蓮傍斜山
而屢轉乘橫流而不前於是素腕舉紅袖長迴巧笑墮
明璫荷稠刺密亟牽衣而綰裳人喧水濺惜虧珠而懷
妝物色雖晚徘徊未反畏風多而榜危驚舟移而花遠
歌曰常聞葉可愛採擷欲為裘葉滑不留縫心忙無假
薰千春誰與樂唯有妾隨君

採蓮賦

梁元帝

紫莖兮文波紅蓮兮芰荷綠房兮翠蓋素實兮黃螺於
時妖童媛女蕩舟心許鷗首徐迴兼傳羽杯櫂將移而
藻桂船欲動而萍開爾其纖腰束素遷延顧步夏始春
餘葉嫩花初恐沾裳而淺笑畏傾船而斂裾故以水濺
蘭撓蘆侵羅襪菊澤未反梧臺迴見荷濕露衫菱長繞
釧汎柏舟而容與歌採蓮於江渚歌曰碧玉小家女來
嫁汝南王蓮花亂臉色荷葉雜衣香因持薦君子願襲

芙蓉裳

採蓮賦

有序

唐王勃

昔之賦芙蓉者多矣。雖復曹王潘令之逸曲，孫鮑江蕭之妙韻，莫不權陳麗美，粗舉採掇。豈所謂究厥豔態，窮其風謠哉？頃乘暇景，歷睹衆製，伏翫累日，有不滿焉。遂作賦曰：

非登高可以賦者，唯採蓮而已矣。況洞庭兮紫波，復瀟湘兮綠水。或暑雨兮朝霽，乍涼颼兮暮起。黛葉青跗，煙

周五湖紅葩絳藕電爍千里尤見重於幽客信作謠於
君子爾其珍族廣茂淑類博傳藻河渭之空曲被沮漳
之淪連燭澄灣而爛爛亘修漲之田田豈直水區澤國
江滄海壖是以吳娃越豔鄭婉秦妍感靈翹於上節悅
瑞色於中年錦帆映浦羅衣塞川飛木蘭之畫楫駕芙
蓉之綺船問子何去幽潭採蓮已矣哉誠不知其所以
然賞由物名興以情遷故其游泳一至悲欣萬緒至若
金屋麗妃璇宮佚女傷鳳臺之寂寞厭鸞局之閑處侍

飲南津陪歡北渚見磯岸之紆直覲旌旄之低舉上苑
神池芳林御陂樓陰架沚殿彩乘漪張燕洛之容衛備
橫汾之羽儀簫鼓發兮龍文動鱗羽喧兮鷁首移咸覩
妝而麗服各分驚而並馳蘋紫漿礙荇觸船危視雲霞
之沃蕩望林泉之蔽虧洪川泱泱兮萑菑積綠水湛湛
兮芙蓉披惜時歲兮易晚傷君王兮未知折紺房與綳
蒨攬紅葩及碧枝迴綃裙兮竊獨歎步羅韞兮私自竒
莫不驚香悼色畏別傷離復有濯宮年少期門公子翠

髮蛾眉頰脣皓齒傅粉蘭堂之上偷香椒屋之裏亦復
銜恩激誓佩寵絨愁承好賜之珍席奉嬉遊之彩旂繡
裳曛兮翠羽帳瑤塘曙兮青翰舟零條拾蕊沿波沂流
池心寬而藻薄浦口窄而萍稠和橈姬之衛吹接榜女
之齊謳去復去兮水色夕採復採兮荷葉秋願承歡而
卒歲長接席而寡仇於時薊北無事關西始樂霧靜江
垠氣恬海漠消怪氣於沅澧照榮光於河洛殊方異類
舞詠相錯王公卿士歌吹並作則有侯家瑣第戚里芳

園穿池瀨岸之曲蓄水河陽之源隄防谷口島嶼輾轅
嘉木畢植靈草具繁沈桂北之丹藕播荆南之紫根鬱
萋萋而霧合燦曄曄而霞翻泊乎氣徹都鄙景華川陸
麥雨微涼梅飈淺燠命妖侶於石城嘯娛朋於金谷乃
使綵珠捧棹青琴理舳舻芳醪藉珍餽汎玉潭之瀰漫
遶金渠之隈隩石近水而苔濃岸連山而樹複排芟末
而爭遠託蘆間而競逐赴汨淩波飛桂振羅風低綠幹
水濺黃螺上客喧兮樂未已美人醉兮顏將酡畏蓮色

之如臉願衣香兮勝荷徘徊郢調悽慘燕歌念窮歡於
水溪誓畢賞於川阿結漢女邀湘娥北溪蕊尚密南汀
花更多恨光景兮不駐指芳馨兮謂何若乃南鄢義妻
東吳信婦結褵整佩承筐奉帚忽君子兮有行復良人
兮遠征南討九真百越北戍雞田鴈城念去魂駭相視
骨驚臨春渚兮一送見秋潭兮四平與子之別煙波望
絕念子之寒江山路難水淡淡兮蓮葉紫風颯颯兮荷
華丹剪瑤帶而猶歛折瓊英而不歡既而緣隈逗浦還

棹歸櫓。羨芳草兮已殘。憶離居兮方苦。延素頸於極漲。
攘皓腕於神許。惜佳期兮未由。徒增思兮何補。又若倡
姬蕩。媵命侶。招羣淇上。洛表湘皋。汝濱望洲。草兮翡翠。
色動浦水。兮驪龍文。願解珮以邀子。思褰裳而從君。悲
時暮。愁日曛。鳴鏐釧兮響窈窕。豔珠翠兮光繽紛。憐曙
野之絳氣。愛晴天之碧雲。擢巡汀而柳拂船。向渚而菱
分。掇翠莖以翳景。襲朱萼以爲裙。艇楫凌亂。風流雨散。
鳴根絡繹。霧罷煙釋。狀飛蚪之蜿蜒。若驚鴻之奕奕。艇

怯奔潮驚憎淺石絛著手而偏遶刺牽衣而屢擘迺有
貴子王孫乘閑縱觀何平叔之符彩潘安仁之藻翰稅
龍馬於金隄命鳧舟於石岸錦纜翻灑銀檣照爛日側
光沈風驚浪深紆北渚之新贈迤東溪之密尋駕鳶繡
彩之文履璫瑁瓊華之寶琴扣舷擊榜吳歆越吟溱與
洧兮葉覆水淮與濟兮花冒渚值明月之夕出逢丹霞
之夜臨茱萸歌兮軫妾思芍藥曲兮傷人心伊採蓮之
賤事信忘情之蓋寡雖迹兆於水鄉遂風行於天下感

極哀樂聲參鄭雅是以緬察谷底窮覽地維北盡豐鎬
滂溥南究巴沱越沂莫不候期應節沿濤汎湄薄言采
之興言服之發文局之麗什動幽幌之情詩使人結眷
令人相思宜其色震百草香奪九芝棲碧羽之神雀負
青隴之寶龜紫帙流記丹經祕詞豈徒加繡柱之光彩
睚文井之華滋已矣哉向使時無其族代乏厥類獨秀
上清之境不生中國之地學鸞鳳而時來與鷦鷯而間
至必能使衆瑞彩沒羣貺色沮湯武齋戒伊臯虛佇豈

俾夫楚童趙僕倡姬豔女狎而翫之擷而採之乎時有
東鄙幽人西園舊客常陪帝子之輿經侍天人之籍詠
綠竹於風曉賦彤管於日夕暑往寒來忽矣悠哉蓬飄
梗逝天涯海際似還邛之寥廓同適越之淫滯蕭索窮
途飄飄一隅昔聞七澤今過五湖聽菱歌兮幾曲視蓮
房兮幾株非鄴地之宴語異睢宛之歡娛況復殊方列
域重瀛複嶂虞翻則故鄉寥落許靖則生涯惆悵感芳
草之及時懼修名之或喪誓將刻跡潁上棲影渭陽枕箕

岫之孤石汎磻溪之小塘餐素實兮吸絳房荷為衣兮
芰為裳永潔已於丘壑長寄心於君王且為歌曰芳華
兮修名奇秀兮異植紅光兮碧色稟天地之淑麗承雨
露之霑飾蓮有藕兮藕有枝才有用兮用有時何當婀娜
華實移為君含香藻鳳池

荷珠賦

以泣珠之
鮮瑩為韻

唐
白居易

迸水所集輕荷正敷引修莖而出葉凝玉液以成珠淨
綠田田神龜之巢處斯在虛明皎皎靈鵲之銜來豈殊

既羅列其青葢又昭章於白榆亂點的皪分規青瑩仰
虛無以上出掩晶熒而外映灑之不著湛兮逾淨時寄
寓於傾欹每因依於平正可止則止必荷之中央在圓
而圓得水之本性颺風既息而常凝魚鳥頻衝而不定
爾乃一氣暗後初陽照前宿雨霽而猶在曉露裛而正
鮮熠熠有光映空水而煥若累累無數遍池塘而炯然
宛轉而魚目迴視冲融而蚌胎未堅因霑濡而小大隨
散合以虧全輕彩蕩淵芳濃厭浥明璣而夜月爭光丹

粟而晨霞散入其息也與波俱停其動也與風皆急若
轉於掌乃是江妃之珠如凝於盤遂成泉客之泣冰壺
捧之而殊倫水鏡沈精而莫及則知氣有相假物有相
資惟雨露之留處當芙蓉之茂時雖賦象而無準必成
形而在茲喻於人則寄之生也擬於道則冲而用之自
契玄珠之妙何求赤水之遺

蓮蕊散賦

有序

唐

蕭穎士


予同生繼天懔威所萃已未歲夏六月旅寄韋城憂傷

感疾腫生於左脇之下彌旬不愈楚痛備至友生于逖
張南容在大梁聞之以言於方牧李公公于之舊知也
俯垂驚嗟遠致是散題曰蓮蕊合之以蘇用附腫上又
覆以油帛以冪之其瘳如洗一夕復故感恩歎異於以
賦焉

彼散維黃曰蓮之蕊有輕其質如雪伊麗君子賚焉厥
疾遄已揆艱疾之永戚矧羈孤之遠情諒積悲而成疾
爰彼腫而斯嬰遘徂夏之赫曦蹇憂虞於此城堆以壅

蓄介於腰腹如煙斯炊如蠆斯觸靡宵靡晝莫獲偃伏
亦既浹辰寘予於毒惴然其恐兮如集於木幸于張之
久要于至貴而為言感知已於名公降踰涯之厚恩旅
信宿以問至致良散以斯存於是滌以蘇膏羈以油帛
茲焉塗附未始竟夕有瘳如神兮厥痛斯滌彼挂帆而
奔駟曾莫速乎靈跡雖兼金而製錦豈厥價而能敵異
哉討竒篇於綠帙搜秘卷於青囊奚要術之備列獨無
聞於此方苟佳名之是徵乃茁茁之餘芳原夫託根清

此敷藹馨香宜蠲穢而蕩邪救吾人之疾瘍於以用之
終然允臧愷悌君子德音不忘昔禽蛇之見挫尚有答
於隨噲矧圓首之為貴聿稱靈於覆載慙力微而施重
懼隕墜於酬戴蓮之蕊今永以為佩



御定歷代賦彙卷一百二十二

欽定四庫全書

集部

御定歷代賦景卷二百三十四

詳校官檢討臣劉炘

主事銜臣徐以坤覆勘

總校官編修臣王燕緒

校對官編修臣潘曾起

謄錄監生臣張濤

謄錄監生臣李維翰

欽定四庫全書

御定歷代賦彙卷一百二十三

花果

宜男花賦

晉
夏侯湛

淑大邦之奇草兮應則百之休祥稟至貞之靈氣兮顯
嘉名以自彰冠衆卉之挺生兮承木德於少陽體柔性
剛蕙潔蘭芳結纖根以立本兮靈渥液於青雲順陰陽
於滋茂兮笑含章之有文遠而望之若丹霞照青天近

而觀之若芙蓉鑒綠泉萋萋翠葉灼灼朱華曄若珠玉
之樹煥若景宿之羅充后妃之盛飾兮登紫微之內庭
回日月之暉光兮隨天運以虛盈

宜男花賦

晉
傅玄

猗猗令草生於中方花曰宜男號應禎祥遠而望之煥
若三辰之麗天近而察之明若芙蓉之鑒泉於是狡童
媛女以時來征結九秋之永思含春風以娛情

紫花賦

有序

晉
傅玄

紫花一名長樂花舊生於蜀其東界特饒中國奇而種
之余嘉其花純耐久可歷冬而服故與友生各為之賦
賦曰

有遐方之奇草稟二氣之純精仰紫微之景曜因令色
以定名剛莖勁立纖條繁列從回風以搖動紛蘭暢而
蕙潔蔚青葱以增茂並含華而未發於是散綠葉秀紫
榮蘊若芝草之始敷灼若百枝之在庭獨參差以照耀
何光麗之雜形渙渙昱昱而奪人目精下無物以借喻

上取象於朝霞妙萬物而比豔莫茲草之可嘉

長樂花賦

有序

唐蘇

頌

蜀太守庭際有紫華草秋中始繁英露洗冬旱尚直本
霜封蕪雜大同於衆卉盛衰小異於羣物余訝而未識
吏或告余曰此長虞所賦蜀長樂花也故心暗賞焉因
口授書吏遂墨而成作恨不見古人所為得髣髴其旨
爾

夫長者以短長之形度其長者至美夫樂者以哀樂之

類同其樂者至喜長也樂也吾安得而聞之嘉纖植之
並用偉令名兮在茲徒見其豐族萃萼高標璀璨莖丹
外而縞中葉縹兮以紅貫綴綠穎之重疊索紫蕤之爛
漫迫而象之君子其常或微或章聳危冠兮纓若綬默
退靜其何望遠以意之佳人欲翔炫煌煌重羅綺兮
撲搖翠蹇來思而未嘗匪以幽兮自直匪以直兮自藏
匪以晚兮自耀匪以耀兮自強文濁露之均麗庇清舒
之汎光本無嫌於散地甘有寓於殊方然則太液初滿

上林新霽茸茸灼爍萬品千計搖瑞色而茁芝雜奇葩
而轉蕙孰與夫玉堂金闕之徧賞白日青雲之特麗歲
不與分時向闌風蕭蕭兮夜漫漫賓遠鴻於沙塞叫離
鶴於江干君曾不見三月華矣盡林間之槁木千霜隕
矣亦庭下之枯蘭懿此常度陵於早寒假春期而不採
雖秋令而不殘衝雨霰之飛薄任雲山之險艱芳弗珍
於霍靡節常慕於檀樂吾則知樹背之奚託傾心之可
安如後凋之是貴罔獨立其誰觀文學掾起而為亂曰

白露瀼瀼何草不黃紫華的的生君之堂彼不伐兮秋
自翳時或珍兮君是惠彤庭赫兮朱草駢交屈軼兮友
賓連伊榛莽而荒些君曷為兮賦旃

杜若賦

齊謝朓

馮瑤圃而宣游臨水木而延佇柳含色於遠岸泉鏡流
於枉渚蔭綠竹以淹留藉幽蘭而容與覽茲榮之悅茂
紛為芳於清籟觀夫結根擢色發曜垂英綠春縈以纖
布蔭涼潭而影清景奕奕以四照枝靡靡而葉傾冒霜

蹊以獨蒨當春郊而逕平蹇汀洲以企予懷石泉於幽
情嗟中巖之纖草廁金芝於芳叢夕舒榮於溽露旦發
彩於春風承義陽之光景庶無悲於轉蓬

蜀葵花賦

梁王筠

惟茲竒草邈花西道凌金坂之威夷跨玉津之浩浩值
油雲之廣臨屬光風之長埽仰椒屋而敷榮值蘭房而
振藻邁衆芳而秀出冠雜卉而當闈既扶疎而雲蔓亦
灼爍而星徽布濩交加蓊茸紛葩疏莖密葉翠萼丹華

蜀葵賦

陳虞繁

惟茲珍草懷芬吐榮挺河渭之膏壤吸昴井之玄精繞
銅爵而疏植映昆明而羅生作妙觀於神州扇令名於
東京馳驛命而遠致攢華林而麗庭申修翹之冉冉播
圓葉之青青

菊花賦

魏鍾會

何秋菊之可奇兮獨華茂乎凝霜提歲蕤於蒼春兮表
壯觀乎金商延蔓蒨鬱緣阪被岡縹緗綠葉青柯紅芒

芳實離離暉藻煌煌微風扇動照曜重光於是季秋九月九日數并置酒華堂高會娛情百卉雕瘁芳菊始榮紛葩韡韡或黃或青乃有毛嫱西施荊姬秦嬴妍姿妖豔一顧傾城擢纖纖之素手雪皓腕而露形仰撫雲鬢俯弄芳榮

秋菊賦

晉 潘岳

垂采煒於芙蓉流芳越乎蘭林遊女望榮而巧笑鵷雛遙集而弄音若乃真人採其實王母接其葩或充虛而

養氣或增妖而揚蛾既延期以永壽又蠲疾而弭疴

菊花賦

晉孫楚

彼芳菊之為草兮稟自然之醇精當青春而潛翳兮迄
素秋而敷榮於是和樂公子雍容無為翱翔華林駿足
交馳薄言采之手折纖枝飛金英以浮旨酒拂翠葉以
振羽儀偉茲物之珍麗兮超庶類而神奇

菊賦

晉卞伯玉

佇寒丘兮彌望覲中霜之嫩菊肇三春而懷芬凌九秋

以愈馥不履苦而淪操不在同而表淑傷衆花之飄落
嘉茲卉之能靈振勁朔以揚綠合凝露而吐英

庭菊賦

有序

唐

楊炯

庭菊美貞芳也天子幸於東都皇儲監守於武德之殿
以門下內省為左春坊今庶子裴公所居即黃門侍郎
之廳事也其庭有菊焉中令薛公昔拜瑣闥此焉遊處
今兼左庶子止於東廳臺宇連接洞門相向每罷朝之
後未嘗不游於斯詠於斯覽叢菊於斯歎其君子之德

命學士為之賦是日也薛愷以親賢為洗馬田巖以幽貞為學士高元思張師德以至孝託後車顏強學沈尊行以博聞兼侍讀周琮李憲王祖英曹叔父以儒術進崔融徐彥伯劉知柔石抱忠以文章顯德行則許子豐耆舊則權無二駱續則古訓之前識張相則老莊之後英並承高命咸窮體物小子託於吹竽之末敢闕其辭哉遂作賦云

日之貞矣於彼重陽菊之榮矣於彼華坊含天地之精

氣吸日月之淳光雲布霧合箕舒翼張鬱兮曼衍郁兮
芬芳玳枝金萼翠葉紅芒其在夕也言庭燎之哲哲其
向晨也謂明星之煌煌爾其萬里年華九州春色花灼
爍兮如錦草絲連兮似織當此時也和其光同其塵應
春光而早殖及夫秋星下照金氣上騰風蕭蕭兮瑟瑟
霜刺刺兮稜稜當此時也弱其志強其骨獨歲寒而晚
登雨還風去天長地久純黃象於后土故採桑而菊衣
輕體御於神仙故登山而菊酒文賓採之而羽化康公

服之而不朽東極於是長存南陽以之眉壽胡大尉之
允誠光輔漢庭萬機理三階平及暮年華髮垂肩秋菊
長英蠲邪滌瘵於焉永貞鍾大尉之聲家彝倫魏室道
合鹽梅功成輔弼降文皇之命修彭祖之術保性和神
此焉終吉君章請老歲久懸車秋風生兮北園夕白露
濕兮前階虛佇閑庭之曠邈對涼菊之扶疎人生行樂
孰知其餘淵明解印退歸田野山鬱律兮萬里天蒼莽
兮四下憑南軒以長嘯出東籬而盈把歸去來兮夫何

為者若夫窈窕重闈亘青瑣兮接皇扉深沈大壯通肅
成兮連博望乃有邕鄉貴族薛縣名家共汾河之鼎氣
同庶子之春華朝遊夕處徘徊顧慕難搖落於三秋偉
貞芳於十步伊纖莖之菲薄荷君子之恩遇不羨池水
之芙蓉願比瑤山之桂樹歲如何其歲已秋叢菊芳兮
庭之幽君子至止悵容與而淹留歲如何其歲將逝叢
菊芳兮庭之際君子至止聊從容以卒歲

園菊賦

明
徐節婦

吳棟
妻

晨步小園一望疎林白雲縹緲黃葉紛紜風蕭蕭而異
響寒凜凜而侵人驚天道已殘秋覺霜氣之稜稜鴈嘹
唳而南還蛩啾唧而哀吟值時景之荒涼菊芳華於後
庭何其晚也是造物之無知乎善爾碧枝點翠嫩萼噴
金無桃李之妖豔抱松柏之堅心雖素雅之非凡奈何
生乎不辰寄寸根於塵世胡為乎不遇乎陽春及其華
也不獲寵而鮮妍兮懷淒楚於秋霜陰雲慘澹以蔽天
今日色薄而無光日色既薄而苦短兮惜乎金英之徒

芳遭風欺而雨妒兮獨斃斃而不變其常吁嗟佳哉細
觀其高世出塵之姿幽默徘徊之態嬾隨俗以富貴愛
清冷而盤桓似有為而不見用於時者也似抱道而隱
逸者也順天而安分者也豈習俗之能知邪重曰聊植
疎籬清且幽兮天運閉塞隱而潛兮隱而潛兮霜淒雨
霏兮百草罷綠爾猶存兮因苦自持時窮見操兮行比
幽人素位履貞兮

白菊賦

有序

明

何景明

甲子九月十四日馮侍御宴集出白菊詠賞屬予賦之
蓋以奉賓主之歡洽耳豈有望於榮觀哉辭曰

繫季秋之將望予恤夫序次之易代既無暇於遊覽亦
索處而寡類接芳鄰之招引誠欽志於雅誨厘主人之
投轄肅羣俊而弭蓋迺陳秋卉以侑觴冀逸興之可貸
咸式燕以延賞異過時而尚愛喜幽玩以怡情追佳節
之莫待豈無得於物觀寔有感於斯會猥受簡以抒思
庶形狀之具載爾其歲紫莖而上擢庶奇茲以孤植葉

卷一百二十三
萋萋其微霏粦粦以寒色申纖縞以自貞羞組綵之
外飾承危朶而不傾挺柔枝而益力香冉冉而不繁豔
娟娟而稍抑態屢覲而愈妍意凝想而彌極始嚴整而
莫褻終溫郁而可節華不露而已章思欲語而復默神
超有而入無豈髣髴之遽得迺若聞館重深高幕虛涼
簷蕭蕭以下月底藹藹而降霜燦灼燦以映夕紛委綴
而明廊素娥兮聯袂青女兮駢妝縹輕鬢以雲鬢皎靚
質而雪光驂連蜷兮鸞鶴服陸離兮珮璫信雕容之可

報嗤效顰之不量於是賓徙倚而久竚若耿耿其懷傷
釭滅影兮續膏夜就深兮移牀馳留歎於永謝結華思
於餘芳允思美之所遇亦既隱而復揚乃歲律之甫遷
慨金氣之何速鳥棲棲而斂融颼颼以驚木怵窮莽
於廣隰班紛薄於修陸衆已謝於場野獨宛轉於寒谷
甘苦心於螻蟻等末幹於樸櫟雖曠絕以自持胡偃蹇
而下伏夕淹雨而泣素朝披煙而委綠羌守操以堅冰
徒有容之若玉儻衣袖之是將亦絃琴而可絳吾觀夫

懷達人之隱德抱貞女之幽衷詎嬰情於豐華奚移志
於始終桃早秀而先萎槿晨敷而暮空苟清白之為尚
曷芊菲之足崇嗟予之不淑兮撫年運而興悲覩茲植
之所由懼修名之失時彼斯人之同志吾何俗之不隨
迺子子以矯激羨草木之所為偉夫君之超越幸方圓
之有持矧諸公之奮竒俱發蹤之可師顧會合之不偶
常寡歡而多離指孤芳而締好創遊燕以為嬉誠後期
之不忘或有徵於徵辭

後白菊賦

有序

明何景明

菊有白色者超越他品予嘗賦之矣丙寅之秋京師桃李皆花予庭是種生意淒然久而不敷至十月始盛開色益鮮厲予感焉復作後賦

大運荒乎何停陰陽奄以代謝究動植之所由嗟何物之弗化時維孟冬金虎兮屏舍白帝兮徂駕氣厲厲兮始嚴景習習兮將下值抱疴以閒居循周除而蕩思庭葉委以陳翳階蘚穢而不治覽庶草之先零撫茲根之

獨遲彼桃李之非令亦競榮而呈姿曄丹華以鬱鬱冒
綠林而萋萋胡衆人之好侈班紛慕其芳非朝絲吹兮
填闔夕車馬兮成蹊咎玄樞之舛訛諒人事之尤違矧
天道之無遠或省予而弗知繫子植之雖晚實鄙志之
所欣賤羣穠之溷濁恥雜敷之糾紛俱並進以取妍表
孤花以見珍寧他卉之我先甘避迹而弗羣乃其蘊金
氣以內凝標皜質而外映蔓不踰垣繁不被徑葉塗塗
其自沃枝矯矯而獨勁宛含意其孰語若鍾情而未定

女幽房而專情士窮巷而寡行服縞組以修容佩珩璜
以照令寄岑寂以怡心襲馨香以飾性無良朋以修好
憾邪妒之干正又如下國之擯臣離宮之斥嬪心忤忤
以惛惛懷耿耿而苦辛緬中宵以前席念昔日之下陳
慨微歎之莫宣若有怨而弗伸分孤蹇以終畢羌孰予
兮幸親結柔條而三喚重延佇而欽心寂闌館以容與
散塵營以滌襟鑒微月之曖曖步列星之森森天窈窕
以條革疾風起而夕陰念沍寒之已逼慘獨悲夫衆林

苟操性之殊軌豈華色之遽沈內慙恨以懷顧悅屏營
以咨嗟觀日月之滅毀恐霜雪之增加抱孤英以自明
悵情親之我遐慮寒香之終匱俾予身之蹉跎負大塊
以馮生豈惟是乎獨嘉物何盛而弗衰亦何枯而弗華
夫芝焚而柏薪皆菸顏而殞葩伊桃李之既零亦奚異
乎泥沙委常運以流轉復胡戚而胡夸誠予表之不爽
彼夸戚兮如何亂曰有美一人揚清芬兮縞袖含香回
素雲兮被服文徽皓續紛兮令儀襜褕斂玉手兮傾城

獨立世不有兮時無蹇修誰則覲兮谷逶迤兮雪霰來
兮衆芳萎兮嗟伊人兮秉志不回兮

牡丹菊賦

有序

元 郝經

初入新館客將宋日新致硃砂紅牡丹菊一本祇三四
花慘悴萎暗不以為奇遂植之穿廊西之隙地今歲忽
茂達成叢高六七尺及秋而放數百花所未見也適王
甫書狀生朝而其花尤盛故作賦以寓感其辭曰

西風悄兮幽局木葉下兮空庭忽異卉之呈芳乃示予

以不情郁霞腴之春姿敷玉瀝之秋英感絳綃於青苞
剪翠羅於綠蓮拆細桃與紫微訝鞋紅與鶴翎高層層
以奕奕重裊裊以盈盈結膩黃以為心抹沈粉而含馨
凝夜氣以夸畫蛇斜陽而睽晴仍牡丹之花王彊將菊
以為名嗚呼噫嘻時哉匪時造化則奪形色不移雖反
常而似妖顧真宰豈予欺寓國色於羈孤謝凡品之芬
非挾金氣於西陸吐霜葩於東籬鄙傾城之鄭袖期佩
蘭之湘纍獨超出於羣倫不繫累於等夷特以秋而為

春乃奇花之出奇彼自為一時殆非後時也且持杯而
浥露更嚼句以待月儘吳江之飛霜甚窮海之饕雪與
後周之姚魏共終全於晚節

木芙蓉賦

有序

明

吳桂芳

芙蓉一名而水木異種產於水者朱夏吐華清芬遠襲
曾子建潘安仁諸人賦之悉矣顧商飈一動即成萎敗
獨木芙蓉當秋始華爛焉秋杪庶幾古人後凋之義而
前代文人罕所摘撰以表厥操余於江藩樵雲邦君池

館見而憐之為作賦焉其辭曰

繁芙蓉之荏苒紛耀美於秋原後羣芳以晚秀排肅氣
而獨然竦修幹兮媚媚爛絕豔兮媚媚厥名拒霜是曰
木蓮當其六合回春三陽散燠百卉具菲衆葩競馥河
澣江皋平原廣陸或無言而成蹊或有情而垂綠爾乃
潛竒秘華隱耀含精蘊朱顏於杏漠斂麗色於玄冥厭
爭榮於淑景恥借拂於東君迨夫白帝司權嚴霜受節
沙鴈齊飛水天相接江蘼芸其以黃林木慘其如伐或

一葉之先飄或萬壑之盡咽爾乃挺然呈秀鬱爾吐奇
玉露濯其翠蓋銀霜發其華滋爰舒紅於枉渚或綴粉
於江涯其始榮也皎如東陽薄扶桑而將出其揚暉也
恍若西施醉上苑而忘歸若乃旭日載升嬌姿未殘燦
彤輝之明媚映朱檻之紆盤耀朝霞兮色奪疑燭龍兮
可攀迴蜀城而作錦點秋水而不寒至於天地晦冥溪
光忽斂細雨霏而淡煙與濃豔相宜朔風駛而火樹與
蒼波互亂於時騷人墨客覩陰晴之異態感浮沈之忽

變馮朱樞而興嗟搖彩筆而染翰爾其貞不絕俗節足
自全不趨時以逐榮歷遲暮而獨妍豈凋貞於霜雪況
比色於綺紈洵晚操之可嘉邈春華之莫班昔楚客詠
乎落英尼父贊夫松柏彼不受變於嚴威夫固聖賢之
所述以余觀於芙蓉曾何愧乎三物

含笑花賦

有序

宋李

綱

南方花木之美者莫若含笑綠葉素榮其香郁然是花
也方蒙恩而入幸價重一時故感而為之賦其辭曰

夫何嘉木之姝媿兮藹芬馥之芳容結孤根於暖地兮
披素豔於幽叢炫麗景之遲遲兮浥零露之濃濃默凝
情而不語兮獨含笑於春空其笑伊何榮兮巧倩洞戶
初起曲欄乍見驚鄰女之窺牆疑寵姬之教戰鄙妖姿
之齟齬謝啼妝之半面態有餘情忽焉改觀國香無敵
秀色可餐挹貞潔之雅志舒婉孌之歡顏寧解頤而啓
齒方墮珥而敬冠苞溫潤以如玉吐芬芳其若蘭俯者
如羞仰者如喜嚮日嫣然臨風莞爾豈褰幃而觀跛將

忘懷於射雉輕可買之千金重迴眸之百媚拔類邁倫
孰與爲比汎激酷烈綽約嬋娟翠葉擁鬢綠萼承顰嗅
之彌馨察之愈妍信色香之俱美何扈芷而握荃若夫
萱草忘憂合歡蠲忿採杜若於洲中擣芙蓉於澤畔藝
菊百畦滋蕙九畹絜長度美固不可一槩而論也方將
移自南國置之玉堂違霜雪之淒冷依日月之末光憑
雕檻而凝彩度芝閣而飄香破顏一笑掩乎羣芳誠可
以承天寵而植椒房者乎

鳳花賦

元
任士林

若知鶴林之神乎霜月如銀西風砭人丹豔自春何以
羽翼賁此坡壠爛然九苞蹲為孤鳳百鳥無聲精采欲
動吾聞蜀山之魄下故墟而啼冤灑丹血以成葩幻女
七之妖仙迺羽族之初服宛來儀之踟躕出不化之神
為帝為鵠為花為人而復幻丹穴之形有不可致詰於
洪鈞雞憚犧而斷尾鶴存雛而拔羽機心洞人網目如
雨將色舉於朝陽甘草木以同腐者乎噫嘻艮嶽之植

政和之網輦而致之汴水湯湯一鷁不發摧折無光天子曰吁謫歸故鄉抱刖而旋東風重芳蓋天津之聲舌既饒矣使一見賞幸則華林之觀銅雀之二喬矣其不為強項供奉之所笑者幾希安在德輝而下之立翠微之曉月伴棟樹之後風萬卉欲寂空山自紅太牢鐘鼓而不慙紅裘檀板而不驚蒼梧楚楚翠竹亭亭清風徐來求凰欲鳴渺不知花之精鳳之靈吾亦蝶我之俱化歌楚詩之商聲

素馨賦

明
黎遂球

登羊城以西望見綠草之田田匪織雨而含珠乃浮香
以如煙弔美人於黃土照明鏡於青天惟斯花之可認
感今昔而相憐爾乃向午如粟薄暮放蕊望通衢之凝
雪列七門而成市得人氣而轉馥在晚妝之初洗圍寶
髻之盤盤貫玉屑而齒齒果並擲於車前香可分於袖
底雜寒具而芬郁蘸琉璃之露水則有青樓姊妹烏衣
兒郎綴流蘇如夾纈挂斗帳之四方鈎珊瑚之橫枝枕

琥珀而低昂如香稻之飼鸚鵡等竹實之供鳳凰羨同
心之可結羌鮮佩而垂璫於是重五之晝雙七之宵或
張翠幄於龍舫或方蘭舟為鵲橋晝則艾虎累累朱符
飄飄飛八張如比翼馳千舸若聯鑣蹋歌珠寺燕客西
壕買花齊喚餘錢亂拋量三斛之蒼璣疑乍泣乎老鮫
與歌聲兮同貫侵酒氣兮如消宵則芳蕤作幄新月如
鉤海上載求仙之童女水際排乞巧之高樓燦明燈於
重簷儼列冕之垂旒何璫瓏之雕玉覆火齊而作舟總

貫蕊之所為若鏤冰而籠箬布經緯以如意象禽魚之
優游恒有香以避暑縱無聲而知秋復有三五之夕月
出朦朧巫壇禮斗神絃舞風白麟雪獅翠鳳玉龍覆官
街以列帳峙重臺而罩櫳咸當門以結綵聯比戶於幃
幪被華鬢與纓絡見瓊島之銀宮齊觀燈而連袂或駕
橋而成虹譬遊蜂之出房若舞蝶之鑽叢聆梵吹於香
國見閭巷皆花封乃若博雅高士道古名家知為那悉
之茗用代陽羨之茶或云當與楞嚴同至或傳載自博

望之槎比石榴而有馨較菩提而擅花又烏能起豔質
而問之夫是以賦芳草於天涯

玉簪花賦

明
田藝蘅

白華六出碧莖森森綠苞敷豔翠葉叢陰皜絲垂鬢黃
檀綴心色美如玉形肖惟簪白貴且重名比南金方其
根萎嚴霜英抽湛露酷暑既徂涼颼初度拂拂翻榮亭
亭挺素皓雪凝條明水挂樹山梔為之抱慚水仙見而
增妒縱玉井之蓮花亦同行而却步迺若微雨乍沐淡

然晚妝洗盡鉛華月映霓裳插瑤笄於綠鬢解瓊珮於
華堂獨持雅潔以壓羣芳鄙芙蓉之多態笑蕙蘭其不
香當百卉之搖落聳孤秀於清商故得列君階除遠彼
塵坐舞媛致疑而反銜逸士欲投而長遯采下體而不
遺入麗藻之槩論苟能刈著而不忘寧辭磨石而終鈍
感德輝於三秋媿草心之徑寸幸朝束於華冠雖夕隕
而何恨

秋海棠賦

明
葉 襄

有美人兮倚山之阿既娉媚以靜冶復窈窕而婀娜薄
春條之闌豔樂秋景之婆娑綠葉紫莖黃中碧柯俯瓊
肌以低顫逞嬌臉之微酡於時玉露流階金風動砌乍
密葉而叢生漸修枝以搖曳煥兮若荷葉之映紅鮮兮
似芙蓉之騁驪體弱還羞身呈却蔽謝炎方之炙熱嬌
處墻陰傍幽谷之清芬端居草際娟娟碧色亭亭朱顏
無勞懶髓有恨蜂攢澹容與以含笑墮錯落之垂鏤洛
浦朝暉神光初動漢宮秋冷環珮空珊撫幽質以自媚

豈柔情之易攀斜傍雕欄閒凭小石態欲墜而還歌心
胡愁而似擗雨淋鈴夜腸斷香魂落葉哀蟬情傷血魄
伴淮南之叢桂零露小山候彭澤之黃花涼風九月若
乃蟲鳴金井露冷銀牀紫苔淹濕紅蕉損芳思欲訴而
無語意如慙而未揚冒零落之蛛絲光搖翠鈿度熹微
之螢火高照紅妝羞衆草以為伍豈無人而不芳既合
簪投終宜瓶隱詎比忘憂還能蠲忿將結侶於幽蘭不
苟榮於朝槿任枯苑以俟時寧假容於丹粉爰有淑女

攀枝執條撫絃而歌歌曰秋風起兮秋葉紅悵落陰兮
哀鳴蟲下階除兮心沖沖賴托根於茂苑兮恐失時以
鮮終幸不蒙垢於穢濁兮擘芳姿而獨崇

簷下雞冠花賦

有序

明仲弘道

百卉以雨露為生簷下則雨露減矣乃雨露減者霜霰
亦減當草枯木落之時此花反得因簷下而晚盛嗚呼
嗇於此者豐於彼造化生物之盈虧固如是其難料也
人奈何以目前之茺枯定將來之榮落邪因作賦以紀

之

幸觀桃李豔春荷
葉吐夏秋桂霜迎冬梅雪逐夢草開
晨睡蓮閉夜候既至而芬芳蕊欲敷而莫假爰有一蕪
在欄之下鷓鴣為羣鴨鳬作亞丹同鶴頂冠非鷗野狀
毳毼而不飛類翰音而實啞乃生長於階除托根株於
簷厦日光射兮無多雨露霏兮亦寡方其炎蒸甫歇金
風乍颺羣株炫采爛焉盈枝爾乃瘦梗寒條較芙蓉而
更寂疎根朗葉對籬菊其多思似班亞退處夫長門如

芋蘿幽閉乎西施迨夫青霜降乎木落白露瀼兮草萎
衆卉兮凋謝爾獨映乎條枚涼飈凜凜兮摧之不能摧
風霰飄零兮欺之不可欺爾於是強項獨發傲骨生姿
朱紫奪采黃白爭奇瓣如扇而半疊子似綴而分披露
盤擎兮五色仙掌搖兮九疑胡前者之偃蹇而後者之
陸離余仰而思俯而惟識造物之有定理豈苦樂而無
等夷然則前之偃蹇也如甯戚之扣角如百里奚之欣
辱又如蘇武之吞氊卧雪王章之涕泣牛衣後之陸離

也如唐且華顛而為秦相呂尚皓首而作周師更如張
蒼七十而稱漢佐王祥六十八而遇晉知先者未必為
幸後者不足云遲苦者乃所釀樂樂者適足增癡物有
循環之數人無長盛之時茲一微卉兮且然豈榮枯禍
福兮而造化乃有所私

紅蓼賦

有序

明
鄧雲霄

送菜園丁餽蓼一本予斥之曰水草瑣品安用溷我惠
砌答曰迎秋彼自佳因姑植之及初秋靈霖都城幾為

澤國萬室沈煙百卉腓萎而此物獨便娟秀翹若矜得
意蓋水種喜水抑亦見所遭偶然感物慨時賦以見志
云爾

水草瑣品其名曰蓼依渚傍江沿池樓沼曾聯蘅杜之
叢亦秀艾蕭之表歲朱顏於夏日舒巧笑於秋風金天
增其爽氣玉露浥其丰容微粵淺翠淡試疎紅妝成顧
影搖曳波中若夫邪溪草淺相流水落曲澈逗駕橫江
驚鶴蓮冷而綠蓋飄颻菱老而碧帶苒弱罷吳歆之舊

曲揚郢歌之新作江清如練片中流過蘭汀而盪槳
倚蓼岸而維舟爾乃逞其秋姿嬋娟可愛厭白蘋之無
色映丹楓而並醉斜度洛神之韞遥承交甫之珮或有
南浦送別轉眼胡越解纜停觴征帆乍滅臨水悲秋肝
腸欲絕同蓼蟲之集苦對蓼花而灑血吐彼水草實軫
人情宜親君子餽自園丁遠辭島嶼近植簷楹赫日行
天危根淺土憔悴枯焦如泣如訴疑水仙之愛惜驅波
濤而入戶匝旬霖雨萬竈產鼃頽垣處處野哭家家岸

迷牛馬畦散桑麻况碧蘭與紅藥能自保其芳華何斯
蓼之得意反潤澤而矜誇皇天兮何極菑沴兮孔棘剥
髓兮椎膏蛇角兮虎翼哀我民兮不若萋楚之無知聊
向蓼花而歎息

御定歷代賦彙卷一百二十三